

每週經課朗誦經文(巴克禮漢羅/教羅)2014/04/20

共同經課 - 1 使徒行傳十章三十四節~四十三節

34 彼得開嘴，講，Taⁿ 我真正知上帝無用外貌取人；35 獨獨 tī tak 邦國見有敬畏伊來行義 ê 人，hō伊歡喜接納。36 上帝所寄 hō以色列 kiaⁿ 孫 ê 話，tùi 耶穌基督來傳和平 ê 福音，(伊是萬有 ê 主)，37 chit-ê 消息 lín 知是 tī 約翰所傳 ê 洗禮以後，tùi 加利利起到遍猶太；38 就是拿撒勒人耶穌，上帝有怎樣用聖神 kap 才能抹伊；伊就四界行做好事，醫好見若魔鬼所壓制 ê；因為上帝 kap 伊 tī-teh。39 見若伊 tī 猶太人 ê 地方 kap 耶路撒冷所行 ê，阮做干證；人就吊伊 tī 柴裡，來害死伊。40 到第三日，上帝 hō伊 koh 活，續出現，41 m̄是 hō眾百姓看，是 hō上帝事先所揀選為 tiòh 伊做干證 ê 人看，就是阮 chiah-ê，tī 伊 tùi 死人中 koh 活 ê 了後 kap 伊 saⁿ-kap lim 食 ê 人。42 伊 koh 命令阮傳 hō百姓，干證 chit-ê 是上帝所立定做活人死人 ê 審判司。43 眾先知亦為 tiòh 伊做干證，就是凡若信伊 ê 人，tùi 伊 ê 名得 tiòh 罪赦。

共同經課 - 2 詩篇一百一十八篇一節~二節，十四節~二十四節

1 Lín tiòh 感謝耶和華，因為伊是好；因為伊 ê 慈愛永遠 tī-teh。2 願以色列講，伊 ê 慈愛永遠 tī-teh。14 耶和華是我 ê 氣力，是我 ê 詩歌；伊亦成做拯救我 ê。15 Tī 義人 ê 布棚內有歡喜 ê 聲，拯救 ê 聲；耶和華 ê chiàⁿ 手施出大權能。16 耶和華 ê chiàⁿ 手 kiáh 高；耶和華 ê chiàⁿ 手施出大權能。17 我 boē 致到死，iáu 能活 teh；續 beh 報揚耶和華 ê 所做。18 耶和華 bat 嚴嚴警戒我；總是未有將我交 tī 死無。19 Tiòh kā 我開義 ê 門；我 beh 人去，感謝耶和華。20 這是耶和華 ê 門，義 ê 人 beh 人去。21 我 beh 感謝你，因為你已經應我；Koh 成做拯救我 ê。22 師傅所棄 sak ê 石，已經成做厝角頭 ê 石。23 這是耶和華所做 ê，咱 ê 日睇看伊做奇怪。24 這是耶和華所定 tiòh ê 日；咱 tī chit 日 ê 中間 beh 歡喜快樂。

共同經課 - 3 歌羅西書三章一節~四節

1 所以 lín 若 bat kap 基督同 koh 活，就 tiòh 求 tī 頂面 ê 事；基督 tī hia，坐 tī 上帝 ê 大 pêng。2 Tiòh 致意頂面 ê 事，m̄-thang 致意地上 ê 事。3 因為 lín bat 死，也 lín ê 活命 kap 基督 saⁿ-kap khng tī 上帝。4 基督是咱 ê 活命；到伊顯明 ê 時，lín 也 beh saⁿ-kap 顯明 tī 榮光 ê 中央。

共同經課 - 4 約翰福音二十章一節~十八節 OR 馬太福音二十八章一節~十節

1 七日 ê 頭一日，清早，天 iáu-bē 光，Boát-tāi-liáp ê 馬利亞到墓，看見石已經 tùi 墓徙開。2 就走去就近西門彼得，kap 別個學生，就是耶穌所疼 hit-ê，kā in 講，有人將主移出墓，阮 m̄知 hē tī tá-lóh。3 所以彼得 kap hit-ê 別個學生出去到墓。4 兩人平平走；hit-ê 別個學生走做頭，比彼得 khah 緊，事先到墓；5 àⁿ 落看墓內，看見幼苧布 hē-teh；獨獨無人去。6 西門彼得 tè 後到，入墓；看見幼苧布 hē-teh，7 koh 看見包頭殼 ê 巾，無 kap 幼苧布做一位，是另外 tī 一所在捲 teh。8 Hit 時 hit-ê 事先到墓 ê 學生亦入去，看見就信。9 因為 in iáu-bē 明白聖經 ê 話，講伊的確 tiòh tùi 死人中 koh 活。10 Tùi án-ni，兩個學生 tò 去家己 ê 家。11 獨獨馬利亞 khiā tī 墓外 teh 啼哭；哭 ê 時，àⁿ 落看墓內；12 看見兩個天使穿白衫，坐 tī 耶穌 ê 身屍所 bat 安置 ê 所在，一個 tī 頭，一個 tī 腳。13 In 就 kā 伊講，婦人人 ah，啥事哭？應伊講，因為人將我 ê 主移去，我 m̄知 hē 伊 tī 甚麼所在。14 已經講 chiah-ê 話，就翻身 òng 後面，看見耶穌 teh khiā，也 m̄知伊是耶穌。15 耶穌 kā 伊講，婦人人 ah，啥事啼哭？你 chhē chī-chūi？馬利亞 phah 算伊是顧園 ê，就 kā 伊講，頭家 ah，你若有扛伊去，請 kā 我講 hē 伊 tī 甚麼所在，我就去收伊。16 耶穌 kā 伊講，馬利亞 ah。伊就 oát-tng 身，用希伯來 ê 話 kā 伊講，Liáp-pho-nî；意思就是，先生。17 耶穌 kā 伊講，莫得摸我；因為我 iáu-bē 上去見父；你 tiòh 去 chhē 我 ê 兄弟 kā in 講，我上去見我 ê 父，亦是 lín ê 父；見我 ê 上帝，亦是 lín ê 上帝。18 抹大拉 ê 馬利亞就去 kā 學生講，我已經看見主；koh 講，主用 chiah-ê 話 kā 伊講。

1 安歇日後，七日 ê 頭一日，天 phú 光。抹大拉 ê 馬利亞 kap 別個馬利亞來 beh 看 hit-ê 墓。2 忽然地大振動，因為主 ê 天使 tùi 天落來，kō 開 hit 塊石，來坐 tī 頂面。3 伊 ê 面貌親像 sih-nà，衫白親像雪。4 顧守 ê 人因為驚，就 ngiáuh-ngiáuh-chhoah，變親像死。5 天使應 hiah-ê 婦人人講，Lín m̄免驚，因為我知 lín teh chhē 釘十字架 ê 耶穌。6 伊無 tī chia，因為伊已經 koh 活，照伊所講 ê；lín 來看主所倒 ê 所在。7 也 tiòh 緊緊去 kā 伊 ê 學生講，伊 tùi 死人中 koh 活，也 beh 事先 lín 去加利利，tī hia lín beh 看見伊；我已經 kā lín 講 lah。8 In 緊緊離開墓，也驚也大歡喜，走去報伊 ê 學生。9 忽然耶穌 tú-tiòh in，講，平安。In 進前，抱伊 ê 腳，拜伊。10 耶穌就 kā in 講，M̄免驚，去報我 ê 兄弟，kah in 去加利利，tī hia beh 看見我。